




GRUPO MUNICIPAL SOCIALISTA DE ALLARIZ



## Ó PLENO DO CONCELLO DE ALLARIZ

### **MOCIÓN SOBRE A MELLORA DA TRANSPARENCIA NO CONCELLO DE ALLARIZ**

Zaida Rodríguez Camba, na súa condición de Concelleira do Grupo Municipal Socialista no Concello de Allariz, ó abeiro do disposto nos artigos 91.4 e 97.3 do Real Decreto 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, presenta a consideración do Pleno da Corporación Municipal a seguinte:

#### **MOCIÓN**

##### **Exposición de motivos:**

As nosas administracións públicas, en xeral, veñen rexistrando endémicos déficits de transparencia que vencellados ao fenómeno da corrupción, están a socavar a confianza da cidadanía nos seus representantes e, xunto coa crise económica que padecemos a desafección está dando paso a unha grave crise institucional e perda de lexitimidade da representación pública.

A tendencia favorable a transparencia no ámbito público está abrindo unha ventá de oportunidades para impulsala, tanto dende unha perspectiva puramente normativa como a implantación dunha cultura de clarezas real e efectiva. Aos servidores públicos tócanos actuar con convicción para non desaproveitar esta oportunidade longamente agardada, que cobra unha especial transcendencia nas entidades locais, cuxa proximidade ao cidadán apertura maiores posibilidades de implantar un modelo de xestión transparente e participativo; en definitiva un Bo Goberno Local.

A cidadanía debe ser o cerne da xestión pública e levar adiante unha xestión transparente dos recursos públicos é unha prioridade no exercicio da política local. A transparencia, pilar fundamental do Bo Goberno, representa non só unha demanda da cidadanía, senón tamén unha oportunidade para a administración local en termos de confianza, lexitimidade e eficiencia, ademais de facilitar a comunicación das políticas municipais.

A transparencia ten que ser unha liña estratéxica na acción e no traballo do noso concello, que debe xogar o papel de impulso na accesibilidade e apertura cidadá do noso goberno local. Un goberno aberto que ten que cimentarse en tres principios básicos:

→ Transparencia: tendo en conta que a información pública é propiedade da cidadanía, ésta debe poder acceder a ela de xeito fácil, cómodo e gratuito. A información debe ser facilitada de tal xeito que os cidadáns poidan avaliar e medir a acción do goberno.

→ Participación: os cidadáns comprometidos deben ter a posibilidade de aportar os seus coñecementos e as súas opinións sobre as políticas públicas do seu concello. Experiencia e coñecemento de toda a sociedade ao servizo do ben común. Para elo faise imprescindible sensibilizar a veciñanza para que se implique e asuma tamén a súa responsabilidade na vida municipal, na casa común de todos/as.

→ Colaboración Público-Privada: a cooperación con outras administracións, cós axentes da sociedade civil local e cós veciños/as individualizados permite maximizar a eficiencia e a eficacia da acción do goberno municipal.



## GRUPO MUNICIPAL SOCIALISTA DE ALLARIZ

Sen transparencia non se pode artellar unha verdadeira participación cidadá. Sen transparencia a participación convertese en manipulación. Si os veciños/as non dispoñen de toda a información precisa para opinar, a súa resposta verase parcelada e non será válida xa que non coñecerá toda a realidade do asunto, senón soamente a parte da que foi informada.

Un Concello transparente é aberto, accesible e ético. Conta cunha administración de calidade e próxima a cidadanía; facilita o acceso a información social, política e económica da entidade local; facilita información oportuna e confiable, de tal xeito que permite examinar ao goberno municipal e formar opinións ben sustentadas; permite que a veciñanza poida realizar un control da acción do goberno, promovendo a rendición de contas e facilitando información sobre actuacións pasadas, presentes e futuras.

Calquera concello con independencia do seu tamaño pode mellorar substancialmente en transparencia. Ese é o caso que nos ocupa. O Concello de Allariz dende fai moito tempo ven apostando decididamente por estes principios. Non se pode perder o ritmo e hai que estar permanentemente innovando e mellorando nesta cuestión vital na vida democrática.

O nos país presenta unhas singularidades e especificidades que dun xeito indirecto inciden nesta vital cuestión: a dispersión xeográfica, o envellecemento da poboación e a baixa demografía, a fenda dixital, a planta local e a insuficiente implicación dos entes supramunicipais.

Tal e como indica a normativa sobre esta cuestión, os eixes da transparencia son:

- Publicidade activa: conxunto de información encadradas nas categorías de información institucional, organizativa e de planificación, de relevancia xurídica e económica, orzamentaria e estatística, información que estará a disposición dos cidadáns a través da páxina web ou sede electrónica municipal, e ofrecerase nun formato claro e accesible, estruturada e reutilizable.

- Publicidade pasiva: o dereito ao acceso a información constitúe outro dos eixes que vertebra a transparencia. Capacitar aos cidadáns a título individual, e a sociedade civil, como interlocutor xeral, para que coñezan o verdadeiro contido e alcance deste dereito fundamental, a fin de poder exercitalo. O silencio administrativo negativo non pode servir de coartada a esta falla de previsión.

- Bo Goberno: unha vez incorporadas ao ordenamento xurídico as obrigas en materia de bo goberno, é desexable que se adopten as medidas precisas para a súa aplicación práctica e así poder dar resposta a finalidade pretendida.

A transparencia veu para quedarse. Por parte da doutrina na materia se propón un decálogo de actuacións que derivará nun marco efectivo de entidades locais translúcidas na súa xestión, que ofrecen un escenario claro de rendición de contas e capacita aos cidadáns para a participación na toma de decisións no marco de desenvolvemento de políticas de goberno aberto.

O pasado 10 de decembro rematou o prazo de dous anos para adaptarse a Lei de Transparencia. Dende ese día tódolos concellos veñen obrigados por imperativo legal a ter publicados nas súas páxinas web “de maneira clara, estruturada e entendible” os orzamentos municipais; os salarios dos seus altos cargos; os contratos asinados, as subvencións concedidas, e outra morea de datos. Pero para cumprir a lexislación vixente nesta materia non basta con publicar datos. A información compartida debe ser “comprensible, de acceso fácil e gratuito”, obrigando a establecer “os mecanismos axeitados para facilitar a accesibilidade, a interoperabilidade, a calidade e a reutilización da información publicada así como a súa identificación e localización”.



## GRUPO MUNICIPAL SOCIALISTA DE ALLARIZ

A Comisión Executiva e o Consello Federal da Federación Galega de Municipios e Provincias, na que se integra o Concello de Allariz, aprobaron o mércores 18 de marzo de 2015, o Plan de Transparencia e Bo Goberno para as Entidades Locais.

No preámbulo deste documento afirmase o seguinte:

*“Os gobernos locais teñen sido nos últimos anos elementos determinantes dos cambios económicos e sociais que se produciron no noso país, contribuíndo activamente á consolidación da nosa democracia, ao exercicio das liberdades, a igualdade e á xustiza social.*

*As entidades locais teñen como característica fundamental a proximidade aos cidadáns, o que se traduce en moitos casos nunha maior efectividade á hora de xestionar os recursos públicos (moitas veces, escasos) e na prestación dos servizos básicos que benefician directamente ás persoas.*

*Nembargantes, como no resto de administracións públicas, en ocasións se producen algúns casos de xestión incorrecta dos recursos, corrupción, transfuguismo, falta de transparencia, incumprimento das obrigas coa oposición para o control da acción de goberno, alonxamento dos representantes públicos da cidadanía, ou convivencia con intereses empresariais ou privados.*

*A ampla difusión deses casos a través dos medios de comunicación e a dimensión e gravidade dalgúns deles, teñen producido un notable e innegable desgaste da imaxe de todos os representantes públicos e unha xeneralizada desconfianza dos cidadáns cara os políticos e as institucións.*

*Por todo ilo, a transparencia na xestión, a rendición de contas ante os cidadáns e a aplicación de fórmulas que combinen a democracia representativa coa participativa, xa non son unha oportunidade aberta para a mellora da gobernanza, senón unha necesidade, e mesmo unha obriga, co triplo obxectivo de recuperar a lexitimidade perdida dos nosos representantes e devolver a confianza cidadá, previr eventuais casos de corrupción ou mala xestión, e reforzar a eficiencia das administracións.”*

Segundo se pon de manifesto o Plan pretende ser un *“mecanismo que favoreza o traballo, na procura dunha administración moderna e simplificada, que produza respostas rápidas, directas e claras aos cidadáns, que teña como meta o consenso político e social, facilitando asemade o traballo diario dos cargos electos e persoal, fixo ou eventual, das administracións locais”*.

A ordenanza tipo que se propón recolle os indicadores do índice de transparencia dos concellos, que son os seguintes:

- Información sobre a Corporación Municipal:
  - Información sobre os cargos electos e o persoal do Concello.
  - Información sobre a organización e o patrimonio local.
  - Información sobre normas e institucións municipais.
- Relacións cós cidadáns e a sociedade:
  - Características da páxina web do Concello.
  - Información e atención ao cidadán.
  - Grado de compromiso para coa cidadanía.
- Transparencia económico – financeira:
  - Información contable e orzamentaria.
  - Transparencia nos ingresos, gastos e débeda municipal.
- Transparencia nas contratacións e os custes dos servizos:
  - Procedementos de contratación de servizos.



## GRUPO MUNICIPAL SOCIALISTA DE ALLARIZ

- Suministradores e custes dos servizos.
- Transparencia en materia de urbanismo, obras públicas e medio ambiente:
  - Plans de ordenación urbana e convenios urbanísticos.
  - Anuncios e licitacións de obras públicas.
  - Información sobre concorrentes, ofertas e resolucións.
  - Obras públicas, urbanismo e infraestruturas.
- Indicadores Lei de Transparencia:
  - Planificación e organización do Concello.
  - Contratos, convenios e subvencións.
  - Persoal do Concello e entidades participadas.
  - Información económica e orzamentaria.

Nos tempos que corren precísase máis que nunca abrir portas e ventás e que a cidadanía sinta as institucións democráticas como propias, máis o seu concello que é a mais próxima, accesible e achegada . O Concello de Allariz precisa tamén estar a vangarda nesta fundamental materia e proseguir no camiño das portas e as ventás abertas á veciñanza que quere construír o seu futuro.

Para elo e como primeiro paso resulta imprescindible adherirse ao Plan de Transparencia e Bo Goberno das Entidades Locais da Fegamp, que pretende ser *“un mecanismo que favoreza o traballo, na procura dunha administración moderna e simplificada, que produza respostas rápidas, directas e claras aos cidadáns, que teña como meta o consenso político e social, facilitando asemade o traballo diario dos cargos e persoal, fixo ou eventual, das administracións locais”*.

Por todo canto queda exposto, veño a propor ó Pleno desta Corporación a adopción do seguinte,

### ACORDO:

**Aprobación da Ordenanza de Transparencia, acceso á información pública e reutilización de datos, na vindeira sesión plenaria do Concello de Allariz.**

En Allariz a 6 de febreiro de 2017.

Asdo.: Zaida Rodríguez Camba.  
Concelleira do PSdG-PSOE en Allariz.

SR. ALCALDE DO CONCELLO DE ALLARIZ.-

